

Uunga siunnersuut: Ilinniartunut tapiisarneq pillugu Inatsisartut inatsisaat nr. xx, xx xxx 2017-imeersoq

(Inuusutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)

Saqqummiussissut

(Inuusutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)

Siullermeerneqarnera

Ilinniartunut tapiisarneq pillugu Inatsisartut inatsisissaattut siunnersuutigineqartumi, innuttaaqatitsinnut Majoriami piginnaangorsarlutik atuartunut, ilinniartunut tapiissutiniq tunniussisarnerup maleruagassiivigineqarnissaa siunertaavoq. Ilinniartunut tapiissutiniq tunniussisarneq, ilinniartut Majoriami piginnaangorsarlutik atuarneranni aningaasaqarnikkut tapersiiviginiarlugit pisassaaq. Ilinniartut taamaalillutik ingerlaqqinnissaannik aammalu suliffeqalernissaannik imaluunniit suliffeqaleqqinnissaannik tapersorsorneqassapput, aammalu nunatsinni suliffissarsiorinissamut ikiorneqassallutik.

Siunnersuummi ilinniartunut tapiisarneq pillugu maleruagassat maannamut atuuttut ingerlateqqinneqarput. Maannamut ilinniartunut tapersiisarneq pillugu maleruagassat annikitsuinnarmik allattugaapput aammalu annertuumik ilinniagaqarneriutitut aalajangersakkat atorneqarnerat tunngavigineqarsimalluni aammalu allaffissornikkut taakkua ilinniartunut tapiissutitut naleqquttussanngorlugit naleqqussarneqartarsimallutik.

Ilinniartunut tapiissutit kommuninit ilinniartunut tunniunneqartassapput, taakkualu tamatuma kingorna aningaasartuutit Naalakkersuisunit utertillugit akilerneqarnissaat qinnutigisassavaat. Taamaattumik ilinniartunut tapiissutiniq tunniussinermi utertillugit akiliisarneq pillugu maleruagassaqalernissaq pingaaruteqarpoq. Maleruagassat taamaattut maannakkut siunnersuummi kapitali 4-mi takuneqarsinnaapput.

Siunnersuut ilinniartunut tapiisarneq pillugu aalajangersakkanik tunngaviusunik imaqarpoq, ilanngullugit ilinniartut qaammammut tapiissutiniq qanoq annertutigisunik tunineqartarnissaannut akigititassat, aammalu ilinniartunut tapiissutiniq tunniussisarnermut tunngaviusumik piumasagaatit. Siunnersuut ilinniartut atuanngitsoortarneri aammalu kommunit, suliffissanut, ilitersuisarnernut pikkorissaqqinnernullu qitiusumik ingerlatsiviit aamma Naalakkersuisut akornanni suleqatigiinneq pillugu aalajangersakkanik imaqarpoq.

Kiisalu siunnersuut piginnaatitsissutinut aalajangersakkanik imaqarpoq, taakkunani Naalackersuisut ilinniartunut tapiissutit allaffissornikkut aqunneqarnerat pillugu maleruagassanik erseqqinnerusunik aalajangersaanissamut piginnaatinnerqarlutik.

Taamatut oqaaseqarlunga siunnersuut Inatsisartuni inussiarnersumik suliassanngortippara.